



## Nachtwandler- Clique 1929

„Wär rächt in Fraiden wandern will“,  
Däm rote mir als Frind:  
Er schliess sich unserer Clique-n-a,  
Will mir Nachtwandler sind.  
Mir sin zwar kaini **Seiplatzross**  
und au nit somnambul,  
Doch wyche-mer d'r Arbet uus  
und hänn **z'nacht** s'beesi Muul.

Zwai Deggler „Kohnberg- „Wällebuur“,  
die schleen e-n-and uff's Dach,  
wie d'Säu hän si sich dert uffg'fiert  
im Storche bi däm Krach.  
Die Händeleie, „Wällebuur“,  
sin doch e Mordsblamasch—  
s'isch glunge—dass du d'Buebeschueh  
**aifach nit abzieh kasch.**

Dr Bummi - Camille - Zwagge Max  
gehn mit e-n-and vor G'richt  
d'r Rotbart Fritz dä dängt: i packs:  
und mischt sich in die G'schicht.  
Illuschtry-Brieder sin die vier  
und Ehremänner ganz!  
Do wird me an-e Schprichwort g'mahnt  
s'isch - **Heieri - was - Hans!**

O Schwyzerkueh halt d'Schnure zue,  
sunscht haut me dir no druff.  
das hesch im Spitz dert kenne g'seh  
bi däm Faszischesuff.  
Hoch Mussolini -- hänn si brielt  
bim Poulet und bim Wy,  
und uff d'r Schtross haut d'Bolizei  
mit Gummiknüttel dry.

E Tanzlokal het Pleite g'macht,  
Me het's jo prophizeit,  
Und au d'r Schittli isch mit Gäld  
schynts bees dert ine keit.  
„Jetzt isch's mir do verleidet!“,  
Rieft unsre Schittli druff:  
„I mach jetz lieber hitte no  
**My Hoselade uff.**

S'Familiebad isch hit modärn,  
Es het sy Raiz---persee.  
Die scheenschte Schungge-Fudibai  
kasch ohni Ytritt g'seh.  
Wie hänn als dert die alte Begg  
Pervärs das Zyg blietz—  
Sie hätte gärn e Zeichnig g'macht  
und **schnäll ihr Bleistift g'spitzt.**

D'Drei-Herreg'sellschaft fyrt famos  
Ihr Fescht vom Vogel Pfyff,  
s'muess jede si e Eidgenoss,  
das isch d'r alti Kniff.  
Bim Aesse aber- suffsch du Wy  
vom ELSASS und TIROL!  
Als simple Schwyzer dängsch derby:  
„O Haimatschutz—läb wohl“.

---

Am ~~24~~ vo däm Monet, s'isch kai Bluff  
träte mir am 7 zobe no mol uff.  
**Im Musiksaal bym Komite-Schlusskonzärt**  
dr Ytritt isch's myseel scho wärt.  
Drum froget hit no eieri Schätz  
und reservieret glie zwei Plätz.  
Im Vorverkauf kasch du si ha  
Am Sunntig däng'sch doch nimme dra.

Vorverkauf: Verkehrsbüro, Aeschenvorstadt  
Zigarrenhandlung Probst, 1 Kohlenberg.